

四書典故辨正續

四書典故辨正續序

乾隆戊戌余偕周理衷先生公車北行見其篋中有四書典故辨正手稟數冊蓋其先頗惡毛西河

果於立論攻訐先儒已甚因枚舉駁斥之爲一編已而歎曰治經須博存衆家衷於一是非輸攻墨守之謂也乃更肆力探索久之得二十卷而命以是名旣刊行矣已酉庚戌間余復與先生相遇京師出所爲續稟見示則凡先儒異義前編所未及致詳者茲復詳辨之而所駁張惕菴翼註論文之說尤多惕菴書不足究詰然

所論衛輒不拒父齊桓糾兄當立尤其疏繆之大者是
編駁之有功名教非但考證精審而已適令子叔耘明
經復攜此彙示余余爲分五卷刻之平陵講舍而述其
梗槩如此他日當與前編合行以惠來學云嘉慶十九
年八月初九日同邑史炳撰

四書典故辨正續目錄

卷一 大學中庸

卷二 論語

卷三 論語

卷四 孟子

卷五 孟子

四書典故辨正續卷一

溧陽周柄中理衷氏著

於緝熙敬止

緝熙二字。詩凡五見。毛傳鄭箋皆訓爲光明。鄭註大學亦同。歐陽永叔詩本義云。緝。續熙廣也。穆穆然文王之德。于此乎續而廣之。敬慎不墜。嚴思庵虞惇讀詩質疑。不從毛鄭而從歐陽氏。云緝熙爲光明。則學有緝熙于光明。復作何解。愚按爾雅釋詁云。緝熙。光也。又云。熙。厥興也。然則熙之單文。其義爲興。緝熙連文。其義爲光。此

古訓也。國語叔向曰。緝明也。熙廣也。註廣當爲光。此緝熙爲光明之明。據惟孔氏書傳于熙字皆訓爲廣。孔傳本東晉人所爲。豈可據之以改古訓。學有緝熙于光明。鄭箋云。學于有光明之光明者。謂賢中之賢也。說似迂曲。卻于字義不謬。章句雖從毛鄭。但分緝爲繼續。熙爲光明。亦與爾雅不合。行葦詩。授几有緝御。鄭箋云。緝續御侍也。獨于緝熙不用分釋。以二字連文。不可分耳。

師尹

師尹。周太師尹氏。此本毛鄭之說。按張大亨春秋通訓

云尹氏者王官之長宰輔之任其曰氏者猶侯氏師氏也。天子之爲政者惟六卿三公宰尹選于六卿兼爲之以論道則曰公以總百官則曰宰以長庶士則曰尹。據此則尹氏官名氏非姓氏。春秋繁露稱湯名相官曰尹鄭康成謂伊尹名摯湯使尹正天下故曰伊尹而尙書大誥尹氏與御事庶士並稱尤官名之確據。或問大誥周公所作公位冢宰爲太師則尹氏卽公兼之而稱尹氏何也。曰周公以成王命作誥自當并及已官。至於欲王違卜則但稱邦君御事庶士而不及尹氏者伐殷本

周公之意。此正周公以太師爲尹氏之證也。先儒據春秋所書之尹氏以說詩。謂尹氏蓋吉甫之後。而卽指常武篇之尹氏爲吉甫。以附合公羊世卿之說。竊恐未然爾。

正鵠

正鵠之說。先儒互異。小爾雅云。射張皮謂之侯。侯中者謂之鵠。鵠中者謂之正。正中謂之鵠。鵠質是鵠。正鵠皆在一侯之中。周禮鄭衆馬融註並云。十尺曰侯。四尺曰鵠。二尺曰正。四寸曰質。爾雅云。是侯皆一丈。鵠在侯中。

正在鵠中。質又在正中。與小爾雅合。賈逵周禮註云。四尺曰正。正五重。鵠居其內。而方二尺。是正大于鵠。鵠在正內。雖內外不同。亦共在一侯。與鄭馬合。鄭康成則云。大射之侯。其中制皮爲鵠。賓射之侯。其中采畫爲正。正大如鵠。皆居侯中三分之一。是正與鵠不同侯矣。如鄭馬之說。則正鵠非的。的在正鵠中。如康成之說。則正鵠卽是的。其異如此。章句云。畫布曰正。棲皮曰鵠。皆侯之中射之的也。蓋用康成之說。

舜年百有十歲

註

史記謂舜年百歲。余前編以爲與尙書不合。及細檢孔仲達正義。知史記亦本之尙書。正義引鄭康成注云。舜生三十。謂生三十年。登庸二十。謂歷試二十年。在位五十。載陟方乃死。謂攝位至死爲五十年。舜年一百歲也。與史記合。蓋鄭注尙書本作徵庸二十。則爲百歲。孔傳本二十作三十。則爲百。有十歲是以異耳。近王禮堂尙書後案。力主鄭注。尙有一左證未引及。按孟子稱大舜五十而慕。趙岐註。書曰舜生三十徵庸。五十在位。在位時尙慕。故言五十也。此雖句讀與鄭不同。然以在位與

徵庸合數之爲五十。知邠卿所見尚書亦作徵庸二十。非三十也。作三十則在位時年六十矣。其不曰二十在位而曰五十在位者。以證五十而慕。故以二十與三十總爲五十文。尤明顯也。趙與鄭同時。而所見之本並同。史記則百歲之說爲是。孔傳晚出。未足据依。

先公

史記周本紀敘周代系。自后稷至文王十五世。與外傳后稷勤周十五世而興之語合。考夏商兩朝。歷一千八十餘歲。更四十七君。而周止十五世。孔冲遠詩疏謂必

在位皆八十許年。乃可充其數。命之短長。古今一也。而使十五世君。在位皆八十許載。子必將老始生。不近人情之甚。故後儒皆以史記爲誤。不知史記未嘗誤也。戴氏東原嘗論之曰。周本紀稱封棄于郛。號曰后稷。別姓姬氏。后稷之興。在陶唐虞夏之際。皆有令德。后稷卒。子不窋立。不窋末年。夏后氏政衰。去稷不務。不窋以失其官而奔戎狄之間。不窋卒。子鞠立。鞠卒。子公劉立。史記不曰棄卒而曰后稷卒。且上承后稷之興。在陶唐虞夏之際。皆有令德。此乃書法也。世次中闕。莫知其名。繼棄

而爲后稷謹守其官。守以至不啻是不一人。故曰皆有令德。及最後爲后稷者卒。其子不啻立末年而失其世守之官。奔竄之際。殆不絕如縷。典文牒記一切蕩然。雖公劉復立國于豳。後已無舊人能追先世之代系。故國語稱十五王。不數其皆有令德。而世后稷者。漢婁敬對高帝曰。周之先自后稷堯封之郅。積德累善十有餘世。公劉避桀居豳。所謂積德累善十有餘世。與本紀皆有令德之文。是漢初相傳咸知不啻已上代系中隔矣。按戴君此條。較索隱所引譙允南之說尤爲明白。千古疑

實得此豁然。吳越春秋帝王世紀等書。以不畱親棄之。
子。由未識子長書法爾。或問山海經云。后稷之孫曰
叔均。始作牛耕。吳志伊廣注引冠編云。稷取姑。人生蔡
璽。蔡璽生叔均。是不畱已上有此二人。曰非也。蔡卽邵
字。不聲緩讀爲蔡。畱聲緩讀爲璽。同鞠則叔均二字之
合音也。古書此類甚多。須讀者善會。

車同軌

朱子或問。軌者車之轍跡。輿之廣六尺六寸。故其轍跡
之在地者。相距之間。廣狹如一。無有遠邇。莫不齊同。至

秦然後車以六尺爲度。愚按考工記輪人云六尺有六寸之輪。軹崇三尺有三寸也。加軫與轅焉。四尺也。人長八尺。登下以爲節。鄭註乘車之軌廣取數于此。匠人云經涂九軌。鄭註軌謂轍廣。乘車六尺六寸。旁加七寸。輻二寸半。輻廣三寸半。綆三分寸之二。全轄之間三分寸之一。凡八尺是謂轍廣。九軌積七十二尺。是兩轍之間相距凡八尺也。車人云徹轍同廣六尺。兩轍端厭牛領者卽軌也。長六尺。此駕牛之車。疏謂以其兩轅一牛在轅內。故兩短而轍狹。不與四馬車八尺者同轍。或問輿之廣六尺六寸之下。似脫旁加七寸。凡

八尺七字。

屋漏

屋漏有三說。鄭箋云。屋小帳也。漏隱也。禮祭于奧。旣畢。改設饌于西北隅。扉隱之處。孔疏。帷幕是大帳。幄爲小帳。禮之有帷幕。皆于野張之以代宮室。其宮內不張幕也。幄則室內亦有之。屋漏者。室內處所之名。可以施小帳而漏隱之處。正謂西北隅也。此一說也。爾雅孫炎解屋漏云。當室之白。日光所漏入。又一說也。劉熙釋名云。西北隅曰屋漏。禮每有親死者。輒撤屋之西北隅。薪以

褻寵煮沐。供諸喪用。時若值雨。則漏遂以名之。必取是
隅者。禮既祭。改設饌于西北隅。今撤毀之。示不復用也。
又一說也。劉說姑置勿論。孫炎之解。孔仲達以爲非。鄭
文蓋鄭以屋爲帳。以漏爲隱。其注儀禮特牲禮云。尸饌
而改饌爲幽闇。庶其饗之。則正以屋漏爲闇處。與日光
漏入之解不同。馮嗣宗既据鄭箋。又用叔然說以亂之。
踈矣。

四書典故辨正續卷二

溧陽周柄中理衷氏著

三年無改於父之道

坊記子云、君子弛其親之過而敬其美。論語曰、三年無改於父之道、可謂孝矣。註云、不以已善、駁親之過。漢書五行志、京房易傳曰、幹父之蠱、有子考亡。咎子三年不改父道、思慕不皇、亦重見先人之非、可作論語注。

北辰

張惕庵曰、或問註中明言北辰北極、天之樞也。朱子語

類又言北辰是極星邊無星處。惟此處不動。講章皆言
北辰北極是兩件。宜何從。曰從註。註非朱子之言。乃爾
雅釋天北極謂之北辰原文也。爾雅或云周公所作。是
孔子引周公之言。卽云子夏作。是子夏釋孔子之言也。
此說之定久矣。安有用邵康節天無星處是辰來翻案
之理。況惟北辰卽是北極。故與爲政相關。史記天官書
中宮天極星。其一明者太乙常居也。索隱引緯書云。中
宮大帝。其精北極。含元出氣。流精生一。文獻通考云。北
極五星。天樞至尊。按通考云北極五星其紐星天之
樞也無天樞至尊語晉志有之天

運無窮。三光迭曜。惟此極星。千古不移。故云居其所而
衆星共之。是從古皆作此解。蓋中宮五星。有帝星。有后
星。有庶子星。太子星。皆人之精。惟此天樞一星。是天之
精。謂之天乙。又曰大帝。此萬靈之主宰。統馭周天之星。
故居所而衆星共之。惟其是個天子諸侯。故德修而民
化之。可以無爲而治。若不共此星。反共無星。是萬國衣
冠不共至尊。而共九天之間闔。豈闔闔亦能修德乎。況
星皆名辰。辰者時也。觀之可以知時。故曰撫于五辰。卽
四時也。火星謂之大辰。水星謂之辰。日月所會謂之辰。

尚書左傳所載甚明。何用將此辰字另改。若云必須辰不動。方配得註無爲天下歸五字。此大誤矣。從地下觀天。凡昭昭者皆動。日動。月動。五星動。二十八宿亦動。中宮五星亦動。此星卽在北斗之前。初昏時斗柄在天。中宮星一一可數。夜半斗沉西。則此中宮星皆不見矣。是極星亦動也。蒼蒼者皆不動。不特北辰旁之蒼蒼者不動。凡蒼蒼者皆不動也。動則無此世界矣。今詳言之。爲大惑者一解。天本積氣。層層包裹。自爲運行。各不相涉。屈原天問曰。圓則九重。孰營度之。此其證也。第一層去

地最近爲月天。其上則水星天。金星天。日天。火星天。木星天。土星天。二十八宿天。第九層謂之宗動天。此卽北辰居其所矣。古今無占法。謂之不動。其實亦動。北斗不見。此亦不見。未嘗凝然如故也。再上一層謂之常靜天。此卽蒼蒼之天。眞不動矣。惟最下有不動之地。故可載此人物。最上有不動之天。故可載此地。若蒼蒼一動。則地卽翻覆。必謂周天皆動。惟此極星旁一塊不動。爲天之樞紐。又大錯。天樞據天文志。是北極名。後人錯認作樞紐。天何用此樞紐乎。九層運轉遲速不同。此樞紐屬

之何天。則詞窮矣。常靜天無星附麗。只是蒼蒼。此蒼蒼不動。故諸天依此立算布度。可以推測。宋沈括夢溪筆談。已有其說。云天必有天殼不動。如道路不動。乃可以算人行之遲速。若道路一動。人不能行。無可算矣。近西人始暢言之。云江河不動。乃可算船之大小。行之遲速。若以此船算彼船。何從知之。故曰。凡蒼蒼之天皆不動。邵子之言。不可據。以改周公子夏之書明矣。愚按此條大謬者五。考天文志。北極五星。一太子。二帝。三庶子。四后宮。五天樞。晉志曰。第二星主日。帝王也。黃帝占曰。太

乙之座。星最明赤者。史記其一明者太乙常是帝。又名太乙也。文獻通考丹元子步天歌曰中元北極紫微宮。居卽謂此星非指天樞。北極五行在其中。大帝之座第二珠。是帝。亦稱大帝也。太乙大帝。皆帝之名。與第五星天樞無涉。北極五星外。又別有太乙天一大帝之星。星書云天一一星在右樞。南畔去極二十度半。入亢宿一度半。淮南子曰。天神之最貴者莫貴于青龍。或曰天一是也。太乙一星在天一南去極二十一度。入亢宿一度。祖暅曰。太乙天帝神也。主使十六神。知風雨水旱兵革疾疫所在之國。是也。天

皇大帝一星在勾陳口中。去極八度半。入室宿十一度。鄭康成註周官大宗伯謂冬至于圜丘所祀天皇帝。星是也。亦與北極天樞無涉。就北極五星言之。則帝爲至尊。而天樞非至尊。若統論中宮之星。則北極之帝亦天下人君之象。而非天之精。天之精則天皇帝是。甘石星經謂此星在五帝座前。其神曰耀魄寶。主御羣靈。秉萬神圖。此誠所謂萬靈之主宰。統馭周天之星者矣。是則衆星之共以爲共至尊耶。則當共帝而不共天樞。以爲共天之精耶。則當共天皇帝而不共天樞。然而

曰衆星共天樞者以天樞最近極居中不動近極故有

無爲之象故取喻焉非以其尊也而惕庵以天樞與大

帝太乙天一混而爲一以爲樞星至尊是天之精大謬

一也蔡邕月令章句云天體渾而包地地上者一百八

十二度八分之五地下亦如之其上中北偏出地三十

六度謂之北極極星是也史官以玉衡長八寸口徑一

寸從下端望之此星常見于孔端無有移動是以知其

爲天中今謂北辰亦動動則旋轉不常何以爲極且與

孔子居所之言顯然相背大謬二也地居天中天以大

氣舉之。朱子云。惟天運轉不息。故接結許多渣滓而成地。揭子宣璇璣遺述云。天以剛風。一日滾轉一周。以運包此地。故地屹然居中而不動。以其行。故不倚。以其周身行。故不徙。以其力而常。故終古存。今謂天一動則地卽翻覆。其說正與相反。大謬三也。九重之說。西氏謂最近者月天。最遠者恒星天。其外爲宗動天。宗動之外則不可思議矣。歷家布算。以天爲定盤。謂之靜天。此靜天卽動天。體內有一定度分。而不易者。非另有一層殼子。不動也。假令更有一層殼子。這殼子又在宗動之上。無

星。辰。之。附。麗。光。象。之。可。求。又。何。所。憑。以。布。算。哉。大。謬。四。
也。天。體。渾。圓。運。轉。無。息。圓。而。運。轉。必。有。樞。紐。之。所。在。此。
理。之。自。然。樞。紐。屬。之。何。天。卽。屬。之。宗。動。天。也。西。氏。之。說。
有。赤。極。又。有。黃。極。安。溪。李。文。貞。公。又。謂。自。恒。星。以。至。月。
天。皆。有。極。說見文集西歷篇然。則。九。層。運。轉。各。有。樞。紐。而。總。以。
宗。動。爲。大。樞。紐。昔。人。比。諸。磨。之。臚。車。之。轂。瓜。之。臚。蒂。是。
也。今。謂。天。無。用。此。樞。紐。豈。誠。翻。身。倚。北。辰。舉。頭。天。外。親。
看。過。來。者。乎。恐。未。便。如。此。言。之。鑿。鑿。也。大。謬。五。也。總。之。
謂。論。語。之。北。辰。卽。指。極。星。舊。說。本。是。邵。子。以。天。無。星。處。

爲辰辰者天壤也此別是一義不必據之以解論語然極爲樞紐是天之不動處極星去不動處一度餘其說始于劉宋時祖沖之而隋書天文志以及沈存中郭守敬趙緣督邢士登諸家並同此說說已具前編蓋極本非星而云極星者指其近極之處而名之經天該曰近極小望強名極是也朱子之言並非臆創奚事嘵嘵多辨爲季氏旅于泰山

旅有二說禹貢蔡蒙旅平孔傳祭山曰旅以旅爲祭山之名周禮大宗伯國有大故則旅上帝及四望注云故

謂凶裁旅陳也。陳其祭事以祈焉。禮不如祀之備也。是旅乃祭名。非專主山川。二說不同。按禮有正祭。有告祭。正祭山川。謂之望。堯典望于山川。春秋書三望。是也。有事告祭。謂之旅。大宗伯旅四望。是也。望爲正祭。天子諸侯皆躬親其事。而旅則令祠官致敬焉。泰山正祭。自有魯君主之。季氏亦未敢僭此旅。泰山蓋有所祈禱。如禱于煬宮。順祀先公而祈之類。以諂媚而行僭越者也。孔子世家補以季氏爲季康子。謂其假旅祭以登太山。而望顓臾之國。謀將取之。其說穿鑿可笑。郎仁寶七修

類藁云。按韻譜。祭名之祗當從示。旅酬之旅卻從方。蓋自增韻誤起。後遂傳寫訛而爲一。愚按玉篇示部祗下云。力資切。祭名。廣韻上聲八語祗下云。祭山川名。郎說本此。然旅自有二義。旅酬之旅。衆也。祭名之旅。陳也。周禮司儀旅擯。鄭司農云。旅讀爲旅于泰山之旅。司農漢人而旅擯旅祭。已不分二字。祗之爲旅。猶禮之爲臚。史記六國表序臚于郊祀。古蓋通用。非增韻誤也。

繪事後素

繪事後素。有數說。鄭康成註云。凡畫繪先布衆色。然後

以素間別其間以成其文。喻美女雖有倩盼美質。亦須
禮以成。此似以衆色喻美質。以素喻禮。文義迂曲。不可
通。張子正蒙云。禮矯實求稱。或文或質。居物後而不可
常也。他人才未美。故絢飾之以文。莊姜才甚美。乃更絢
之用質素。下文繪事後素。素謂其材。字雖同而義施各
異。故設色之工。材黃白者必繪以青赤。材赤黑必繪以
粉素。此以兩素字各自爲義。言繪畫必視其材料而設
色。如莊姜美質。則以質素爲絢飾不尙文也。亦與夫子
釋詩本意不合。陸象山語錄云。繪事後素。謂先布衆色。

後以素間別其間。蓋以比其目之黑白分也。此說尤非。素絢句。總承倩盼。豈獨爲美目作註釋哉。惟朱子取楊龜山說。以禮器白受采之義釋之。此爲確解。而又引考工記畫績之事。後素功以證。則未免有誤。蓋論語之素。是素地。言有此素地。然後可施五采。考工之素。是素功。言畫繪先布衆色。而後施素采。爲素易漬汙。故後布之。其義各別。不當以彼釋此。

媚與媚竈

媚與媚竈。又有二說。張宣公論語解引程子云。奧喻貴。

臣竈喻用事者與集註奧喻君竈喻權臣小異而其義
彌短。此無庸辨者。李文貞論語劄記云。古五祀皆有祭。
室中有奧。是一家之最尊者。疑中雷之祭當設于此。五
祀之中。中雷爲尊。然竈者飲食所從出。婦人孺子咸奔
趨焉。故時俗爲此語。而賈述之愚。按月令。中央土。其祀
中雷。鄭註。祀中雷之禮。設主于牖。牖在室之西南隅。詩
所謂宗室牖下。卽奧也。文貞所疑。此其明證。但古以室
之中央爲中雷。是以月令孔疏引喪禮浴于中雷。飯于
牖下。明中雷牖下爲兩地。則中雷之祭雖設于奧。不可

即。以。奧。爲。中。雷。況。五。祀。皆。迎。尸。而。祭。于。奧。而。以。媚。中。雷。
爲。媚。奧。語。亦。欠。明。恐。非。是。

子入太廟每事問

周禮太史大祭祀與執事卜日戒及宿之日與羣執事
讀禮書而協事祭之日執書以次位常欲辨事者攷焉
每事問蓋辨事而攷質太史之禮書此禮之所有故曰
是禮也若本無辨事之禮而聖人以問爲敬謹則是夫
子自行之禮而不得直云是禮矣顧瑞屏謂子入廟當
是隔日宿齊始可每事問或又作平日往觀如荀子所

載孔子觀于魯桓公廟有欹器。問守廟者曰：此爲何器之類？並非。

子謂韶章

孔安國註：舜以聖德受禪，故盡善。武王以征伐取天下，故未盡善。朱註本此，而張惕庵非之，謂盡善未盡善，不是論聖人爲以樂養德者，審所擇，欲其從韶樂服習，以收陶情節性之效，勿偏於發揚蹈厲，恐爲血氣所使也。湯武革命，順乎天，應乎人，今爲之惋歎曰：惜乎不如揖讓，然則桀紂之作惡，民之罹于湯火，將立而視其死與。

此非夫子論樂之言也。愚按此說謬甚。夫征誅之未盡
善。非謂不當征誅。如蘇氏武王非聖人之說也。伐暴救
民。自是天命。人心交迫。不得已而應之。然此不得已處。
卽是未盡善處。作樂時正揭此苦心。明示萬世無絲毫
諱飾于其間。所謂惟樂不可以僞爲也。季札見舞韶濩
者。曰猶有慙德。聖人之難也。亦是此意。豈以征誅貶武
王哉。周頌有瞽篇。始作大武之樂。而合乎祖之詩也。本
傳其曰嘒嘒厥聲。肅雍和鳴。卽韶之八音克諧。無相奪
倫也。曰先祖是聽。我客戾止。永觀厥成。卽韶之神人以

和也。惟武舞之初。發揚蹈厲象太公之威武。鷹揚至于武亂。皆坐以象周召之治。則以文止武氣象一變矣。孔子與賓牟賈論武之遲久而曰。周道四達。禮樂交通。春秋傳言武有七德。禁暴戢兵。保大定功。安民和衆。豐財者也。武樂何嘗偏于發揚蹈厲乎。周禮保氏教國子以六樂。雲門。大咸。大韶。大夏。大濩。大武。大司樂以六舞教國子。舞雲門。大卷。大咸。大磬。大夏。大濩。大武。內則十三舞。勺。成童。舞象。皆武樂也。周公以之教人。而孔子恐其偏于發揚蹈厲。爲血氣所使。則周公之教非矣。豈夫子

論樂之言與。

足恭

足恭。集解有二說。孔註。足恭。便辟貌。正義。此讀足如字。便辟。其足以爲恭。謂前卻俯仰。以足爲恭也。一曰。足將樹切。足成也。謂巧言令色。以成其恭。取媚于人也。愚按。表記云。君子不失足于人。不失色于人。不失口于人。以足與言色爲三項。大戴禮。曾子立事篇云。足恭而口聖。以足與口爲對文。管子小匡篇。曹孫宿之爲人。足恭而辭結。以足與辭爲對文。此足當讀如字之證。史記日者

傳熾趨而言。案隱曰。熾趨猶足恭也。以足恭解熾趨。知唐人亦讀足如字。集註云。足過也。用後音而小變其訓。似不如前說爲長。書罔命。無以巧言令色。便辟側媚。孔傳。巧言無實。令色無質。便辟足恭。釋文。足將住反。禮記仲尼燕居。給奪慈仁。鄭注。巧言足恭之人。似慈仁。實鮮仁。釋文。足將注反。又如字。

與之粟九百

九百不言其量。孔註云。九百斗。按史記孔子世家。衛靈公問孔子居魯得祿幾何。對曰。奉粟六萬。衛人亦致粟。

六萬。張守節正義云。六萬小斗。計當今二千石也。周之斗升斤兩。皆用小者。如張氏說。六萬斗爲二千石。則九百斗止三十石耳。按古之一斗。比今斗爲四升。九百斗之粟。當今三十六石。張氏亦言其大畧而已。以此考之六萬斗當

今二千四百石

子謂仲弓

張惕庵曰。仲弓爲宰。有取士之責。夫子旣告以爾所不知。人其舍諸。此又更端語之。欲其惟才是視。無拘于世類。俾秀民之能爲士者。勿困于農犁牛之子。此其義也。

父賤行惡。集註沿註疏舊說。未及改耳。用勿用。關仲弓何事。而比其父爲牛。夫子豈肯出此言。仲弓豈樂聞此言。愚按張宣公論語解。先有是說。余以爲不然。夫子果欲仲弓取人。勿拘世類。自可直截言之。何必云。雖欲勿用。反若仲弓有妬忌心。腸者。史記云。仲弓父賤。人不言行惡。家語云。生于不肖之父。蓋賤卽不肖。以無才能可取耳。賤人而比之犁牛。亦猶服輓以耕于野之說。並非醜詆。古人立言。無所忌諱。莊周自比于龜。曰。吾將曳尾于塗中。如今人以龜爲諱。此語幾成笑柄矣。仲弓父賤。

四書本義卷二
三
世俗之見。未免以流品爲嫌。故夫子旣特表之曰。可使南面。此又云。雖欲勿用。山川其舍諸。所以破庸人之論也。何必又生異解。

夫子爲衛君乎

張惕庵曰。夫子嘗言危邦不入。亂邦不居。衛父子爭國。豈非亂邦。夫子何以久居其所。父子爭國。其曲在子。子貢冉有何消問。按春秋傳事蹟。晉定在位。世卿擅國。誅求無厭。厚責賄于諸侯。衛靈首叛之。從齊景伐晉。晉趙鞅忿甚。遂伐衛。盟于鄆澤。使成何涉佗辱衛靈。授手及

宛衛遂與晉絕。魯哀公二年四月丙子，衛靈薨。六月乙酉，趙鞅納蒯聵于戚，相距止六十日。劫蒯聵爲質，將滅衛以報夙憤也。蒯聵旣不能如公子良，請無與伐鄭，則不得不如蕭正德爲侯景所使。公子郢知其故，決不肯立衛人。惟有立輒可以保國。蓋蒯聵卽至愚，亦知輒之國卽己之國，不肯爲趙鞅致死。旣入戚，卽居戚，不復入衛。此時衛人旣以立輒可以內安蒯聵，而外距趙鞅爲得策。故國人多爲之。晉惠居秦，子圉在國，鄭成居晉，子髡頑在國，邾子居吳，子革在國。春秋多有此事，所以子

貢曰諾。吾將問之。若以子拒父。何問之有。是年八月。趙鞅移圍戚之師。與鄭人戰于鐵。已勝而歸。三年春。齊景公使國夏與衛石曼姑圍戚。其意欲逐蒯瞶以取勝。于趙鞅時。子貢冉有在衛。發問當在此時。迨秋季。桓子卒。季康子召冉有歸魯矣。夫以齊之強。帥師圍戚。不能有所加于蒯瞶。得安然居戚者十餘年。自是衛輒爲之禦侮。輒亦藉嫡孫當立之說。柴立其中央。俾南子不敢出而戕蒯瞶。蒯瞶亦不得入而害南子。故衛人諡輒曰孝公。非是衛人盡如令狐潮不識人倫。冉有子貢亦忽然。

有迷罔之疾也。以恒情論之。相忍可以爲國。大義何必深求。若以伯夷叔齊之賢處此。則固有道矣。乘齊師之旣退。以一旅送南子歸于宋。祝之曰。生毋相見。死毋相哭。躬迎蒯聵于戚。泣涕避位。以讓其父。此卽求仁得仁。卽曰蒯聵不良。反國之後。必不利于其子。此正如夷齊餓死首陽。意中之事。無可怨者。計不出此。貪國爵而怵禍害。徘徊于騎虎之不得中下。忍心害理。律以不仁。何所逃罪。謂其據國距父。則事蹟實不相符。蓋南子未死。蒯聵本不敢歸國。觀其于哀十六年反國。告于周天王。

猶云蒯瞶得罪于君父君母竄居于晉是蒯瞶本以南子爲母有所顧忌自不入國非輒拒之及蒯瞶通孔姬盟孔悝以入國輒卽駕而奔魯奔未數月蒯瞶欲召亡君而不果是時距衛靈元年將五十載南子或已死或老無能爲無可攷但衛輒不但未嘗憑城抗拒如郭登之于明英宗亦未嘗有防閑猜忌如李輔國之于唐明皇所少者夷齊一讓耳愚按此條持論乖謬至爲無理考當時事實衛靈與齊魯相結叛晉晉趙鞅屢欲逞志而不能乘靈薨輒立納蒯瞶以與輒爭其意在亂衛蒯

贖既入戚。明年齊與衛圍戚。其意在拒趙鞅。以理言之。
蒯贖得罪出奔。未嘗有先君之命。召令還國。本不可以。
君衛。而趙鞅挾蒯贖以爲質。乘喪嫁兵。在衛人則贖猶。
外寇。禦盜詎可。開門在衛。輒則贖實所生。投鼠自當忌。
器。而輒居中坐視。若不知有父之在戚者。則拒晉卽拒。
父也。毛西河有拒晉非拒父之說。楊庵亦畧本之。今左袒衛。輒謂非距父。夫

拒父而必憑城抗拒。拒如郭登之于明英宗。防閑猜忌。如。
李輔國之于唐明皇。則不討賊不得爲弑君。不嘗藥不。
得爲弑父。于春秋之義固已不合。況帥師圍戚。明明抗。

拒何自而平反之。南子與蒯瞶其勢雖不兩容。然蒯瞶
僅保戚國人莫助。無內援焉。得入而害南子。外恃趙鞅
之力。齊衛兩國共圍。且不能取勝。而求援于中山。見園
南子又何能出。而戕蒯瞶。蒯瞶之安然居戚十餘年。恃
有趙鞅。今忽以禦侮歸功于輒。齊圍戚而輒未嘗禦之。
衛圍戚而輒未嘗禦之。吾不知其所禦何侮也。鄭厲公
突既出奔。復入于櫟。居櫟十八年。鄭更三君而突安然
無恙。此亦鄭君爲之禦侮耶。至蒯瞶之不遽入衛。非不
欲入也。勢不能也。鄭厲公居櫟。國人無裏言不能入鄭。

及傅瑕爲內應。始入鄭而有其國。蒯聵亦然。孔姬爲內應史

記衛世家言蒯聵居外。怨大夫莫迎立。及卽位。欲盡誅大臣。則其志在得國而內無應援。亦可知矣。今謂蒯聵本以南子爲母。有所顧忌。自不入國。又謂知甞之國卽己之國。旣居戚。不復入衛。一似可以入國而不入者。欲爲拒父翻案。遂并蒯聵之爭國而諱之。兩面周旋。皆曲說耳。總之靈公沒而蒯聵在外。夷齊處此。必不肯立。公子郢不欲以庶子嫡而甞。乃以子代父。卽此便已不仁。旣立矣。晉納蒯聵。甞于此時。惟有棄國而逃之一法。斷

無出南子而迎蒯瞶之理。南子雖淫亂未嘗見絕于先君也。魯文姜與弑桓公。春秋書夫人孫于齊。公羊傳曰。念母也。曷爲于其念母焉。貶不與念母也。與弑大惡故。魯莊可以絕文姜而衛輒不可以出南子。出南子而迎蒯瞶。是知有父而不知有祖也。輒本無父。今又教之蔑祖以亂易亂。此種議論何以維持名教乎。按史記孔子去衛如陳。在魯哀公二年。夏衛靈公卒。輒立。晉納蒯瞶于戚。明年齊衛圍戚。皆孔子在陳時事。是秋季康子召冉求召之于陳。非召之于衛也。今謂圍戚之年子貢

冉有在衛發問當在此時亦誤。史記魯召冉求將行孔子思歸送冉求因誠
日卽用以孔子爲招云

三以天下讓

張惕庵曰此章有實事前儒未詳考讓商讓周皆非正解今詳辨之傳國之法殷道尊尊一生而一及一生者太子嗣位身後卽立母弟謂所同生也一及者此太子母弟承位之後卽傳此母弟自己之子不復傳弟謂世及也泰伯嗣位後次宜及仲雍仲雍之後卽雍之子周章宜立者禮也太王遷岐在武丁之五十八祀次年武

丁崩。帝祖庚立。越七祀。祖庚崩。帝祖甲立。祖甲二十八
祀。文王始生。生有聖德。彼時泰伯無子。周章之生。先後
不可知。太王播遷之後。得此聖孫。自慶先業昌熾。人情
之常。非卽萌廢立也。泰伯承父之志。欲讓儲貳于季。歷
以及文王。太王不許。宮之奇云。泰伯不從。是以不嗣。不
從者。不從避位之言也。太王旣不廢泰伯。別無讓法。乘
父之疾。託採藥之說。挈仲雍同去之荊蠻。太王旣沒。季
歷雖欲效叔齊之義。不可得矣。泯然無迹。何得而稱此
所以爲德之至也。此時只是讓國。夫子因武王纘成業。

而有天下。謂之讓天下耳。文王生三十五年。然後季歷受帝乙圭瓚之錫。爲西伯。文王立承纘西伯之位。三十一年。而後帝乙崩。紂立。紂爲天子三十二年。而亡。使文王爲西伯之時。帝乙立微子啓爲太子。則文王一西方諸侯。並無服事至德之名。武王又安得有伐商之事乎。魯頌居岐之陽。寔始剪商。不過言周先在豳。與狄迫處。至太王遷岐山之陽。締造方有規模。後來剪商之業。寔始于此耳。寔始二字。文義顯然。泰伯只是讓國。卻不是明讓。令王季不得。不受。舉世皆莫之知。視夷齊衆所屬。

耳目者不同。故夷齊稱古之賢人，泰伯獨稱至德。然非仲雍賢，此事亦不能行。故仲雍與夷齊同列逸民。此書寔事寔義，不過如此。遂古之事雖不可知，自帝堯甲辰卽位後，據邵子皇極經世與竹書紀年參以尙書史記，事蹟一一可攷。特詳序以破羣疑。愚按此條謂泰伯只是讓國于弟，不是讓商讓周。魯頌寔始剪商，言王業始于太王，非太王有剪商之志。此皆前人成說是固然矣。其詳序處卻多謬誤。兄終弟及，殷制也。周自后稷以至文武，皆父子相繼，不用殷制。太伯君吳，仲雍嗣之。以太

伯無子故耳。並非傳弟何用牽引殷制爲說。至云仲雍之後其子周章宜立。又云周章之生與文王先後不可知。此語尤謬。史記吳世家仲雍生季簡。季簡生叔達。叔達生周章。周章仲雍之曾孫。非仲雍之子。仲雍與季歷爲兄弟。弟甫生子而兄已有曾孫。豈有此理。史記及邵子經世書不著太王遷岐之年。竹書武乙元年。邠遷于岐。周金仁山通鑑前編則繫之小乙二十六祀。或又云在廩辛時。其說不同。今定以爲武丁之五十八祀。是武斷也。左傳宮之奇曰。太伯不從。是以不嗣。杜元凱注云。

不從父命。卻不言父命云何。後儒謂不從剪商之志。語固有病。顧亭林杜解補正云。太伯不從。謂太伯不在太王之側爾。史記述此文曰。太伯虞仲。太王之子也。太伯亡去。是以不嗣。以亡去爲不從。其義甚明。此說最穩當。今改太伯不從爲太王不從。謂太伯欲以儲貳讓季歷。太王不許。則自書傳以來。並無此說。使太伯果讓季歷。而太王不許。然後逃去。則其讓已顯著矣。何無得而稱之。有此不惟武斷直捏造耳。古事久遠難攷。卽如帝堯卽位。竹書在丙子。路史在戊寅。章俊卿山堂考索在癸

未皇甫謚世紀邵康節經世金仁山前編在甲辰。究竟未知孰是。太史公書自周共和以後始紀年。蓋其慎也。今謂事蹟一一可考。其所考者不出金氏前編。而遽云先儒未及不已汰乎。

黻

張惕庵曰黻服之畢也。故亦謂之禪。乃最後結束之服。天子純朱諸侯黃朱。大夫赤黻。其形刺繡作兩已相背。取其有別也。愚按毛西河謂蔽膝名韍。此經作黻。非蔽膝而不知黻。與韍通。余前編已辨之。此又以蔽膝之韍。

與刺繡之黻混而爲一。則更誤矣。黻文兩已相背。繡於裳。不繡於鞞。明堂位有虞氏服鞞。夏后氏山。殷火。周龍章。鄭注。舜始作鞞。以尊祭服。禹湯至周。增以畫文。後王彌飾也。是鞞但有畫文。而不刺繡。今謂繡黻於鞞。杜撰極矣。鞞又名鞞者。陳氏禮書云。以其弗前。故曰鞞。以其一帀而足。則曰鞞。亦非取最後結束之義。

溝洫

註云。溝洫。田間水道。按。溝洫。非專爲治田而設。禹貢云。九川滌源。溝洫者。諸川之源也。洪水時至。得溝洫以貯。

之則其水不盡歸于川。此急來緩受之法。昔之論治河者。謂天下之水。當以天下分之。禹之決川疏河。所以抑洪水也。其盡力溝洫。所以備洪水也。以天下之溝洫。盛天下之霍潦。黃河安流入海。後世溝洫廢而霖潦無所容。是以有徙決之變。禹所以思患豫防。終身孜孜於此也。註云。備旱潦。按旱無可爲。以備潦耳。方望溪禮記析疑云。古者井田之溝洫。所以備水潦。非如東南下濕。可蓄水以溉田。詩小雅。滌池北流。浸彼稻田。蓋豐鎬之間。偶或有此。周官。稻人掌稼下地。蓋必積水之區始

可用溉其餘平原廣陸。惟望雨澤。故旱則雩祀。未聞有蓄水溉田之法。尚書曰。濬畎澮距川。孟子曰。七八月之間雨集。溝澮皆盈。其涸也可立而待也。則主於宣洩而非蓄。以灌溉明矣。觀此則知備旱不過帶說。楊升庵謂桔槔剡斗。古有爲之者。漢陰丈人所謂機事。然非通行之法也。

趨進

註疏皆不言趨進在何時。江慎修云。以儀禮考之。廟中相禮時也。廟中相禮。上擯之事。卿爲之。孔子大夫而相。

禮攝相也。說本聘禮孔疏賓既入廟。君與賓皆升堂。賓致命。公將北面拜貺。拜君命之辱。其時擯者位在中庭。從中庭進至阼階西。釋辭于賓。以相公拜。經文擯者進。卽此趨進之進。不言趨者。省文。時賓已致命。君已左還北鄉。將拜。擯者從中庭進至阼階西。有數十步。不宜紆緩。故必當趨。按此說亦自有根據。但謂孔子初爲承擯。及入廟相禮。命攝上擯。雖本孔疏。按之本經。無明文可據。余讀周禮司儀。推求每門止一相之義。著有臆說一條。可與此經趨進互相證明。今錄于左。

司儀每門止一相。鄭註每門止一相。彌相親也。止之者絕行在後耳。按註語蒙晦。殊不可曉。正義于彌相親也。無解釋。其疏絕行在後云。知不全入而爲絕行在後者。以聘禮介皆入廟門。門西北面西上。故知此君介亦入門。門西北面西上。故云絕行在後。後亦入廟也。此亦強爲之說。于經義不可通。介者賓之副。賓入介從。無每門停止之理。如謂止于廟門外。又不得言每門也。竊意每門止一相。謂主君。擯者。不兼介。言蓋賓入門。主君與賓並行。凡經三閤門而至太祖廟門。每門每曲揖。擯者先。

行而止于門以相君而導賓門各一人故曰每門止一相。論語記孔子爲摯所謂趨進翼如者當在此時。蓋先行則不容紆緩故當趨每門一相則承摯紹摯皆有事不必攝上摯也。此雖臆說識之以備一解。

賓退必復命曰賓不顧矣。

聘禮鄭註君命上摯送賓江慎修謂鄉黨註復命不考此註似復命二字爲虛文若非君有命何以謂之復命乎。按主君送賓及大門內命上摯送賓出大門此以待卿大夫之來聘者若兩君相見則主君送賓大門外不

命上擯送也。君雖不命而曰復命者。擯由君召則自始。至終皆君命也。又何不可謂之復命乎。此節据揖所與立。左右手明是兩君相見。交擯傳辭。江氏以春秋不書疑爲大夫小聘之事。臣聘用旅擯而亦以交擯待之者。當時不能如禮也。夫鄉黨記禮而先坐以不能如禮之失。何以垂法乎。或謂孔子攝上擯于復命可見復命上擯之事。此亦不然。經文特下必字。正以上擯或不復命。孔子雖爲承擯必復命也。旣攝上擯則自當復命。無庸言必矣。

執圭

辨萬充宗子男執圭不執璧之說

五等之瑞。公侯伯執圭。子男執璧。周禮大宗伯文也。萬充宗辨之曰。曲禮凡摯諸侯圭。是子男同執圭也。雜記贊大行曰。圭公九寸。侯伯七寸。子男五寸。是子男不執璧也。獨此言子男執璧耳。夫曲禮言摯。自天子達庶人。且詳及婦人。童子野外軍中。何獨畧于子男。雜記則更詳其長短之度。蓋列爵雖五。而車旗服物之等。維三大率降殺以兩。則九寸七寸五寸之文。必有所據。何是此非彼乎。覲禮天子當依南面立。諸侯入廟門右。坐奠圭。

再拜言諸侯則子男在其中。言奠圭而不及璧。則子男執圭可知。禮器云。禮有以少爲貴者。圭璋特。謂朝聘用圭璋。圭璋皆特達。享禮用璧琮。則以束帛荐之。若子男執璧。則璧亦有持時矣。何以不言乎。顧命云。上宗奉同瑁。玉人云。天子執瑁以朝諸侯。說者謂瑁方四寸。邪刻之以冒諸侯之圭璧。夫圭方璧圓。瑁可冒圭而不可冒璧。且未聞天子有兩瑁也。亦必無置子男而不冒也。則五等皆圭益信矣。況圭以爲摯。手所執也。當朝覲行禮。使子男執璧。若奉槃然。尙何禮度足言乎。愚按子男執

璧見大宗伯又見典瑞大行人小行人安得有誤萬氏
謂朝聘用圭璋璧琮惟享禮用之荐以束帛非手持之
物然周禮射人云三公執璧此非璧亦手持之明證乎
子男執璧不執圭鄭康成云未成國也觀諸侯未踰年
曰子蠻夷雖大曰子故子者未成國之名男之名亦猶
夫子耳子男未成國而執璧與三公未有國而執璧其
例正同且摯之等有圭有璧有皮帛王之三公執璧孤
執皮帛皮帛次于璧也而典命云諸侯之適子未誓以
皮帛繼子男惟子男執璧故諸侯之適子以皮帛繼之

猶之三。公執璧而孤以皮帛繼之也。若子男執圭則皮帛不得繼子男矣。玉人云桓圭九寸公守之信圭七寸侯守之躬圭七寸伯守之而不及子男。惟子男不執圭。故文闕使其執圭則九寸七寸五寸何以不遞數之乎。若謂執璧如奉槃無禮度則執圭如持板有何禮度而二生一死乃用禽獸益無禮度之足言矣。曲禮云凡摯諸侯圭。覲禮云諸侯奠圭言圭則璧在其中。經傳之文固有舉一以包二者何獨於此而泥之。至天子執瑁鄭註云言德能覆蓋天下疏引尚書大傳云古者必有瑁。

言不敢專達之義。天子執瑁以朝諸侯。見則覆之。彼註云君恩覆之。臣敢進。並不言冒。諸侯圭惟顧命孔傳始有邪刻以冒圭之說。孔傳晚出不足信。而萬氏据之以爲五等皆圭之證。誤矣。因遯喜齋大全採其說。故錄而辨之。

任鈞臺云。天子朝諸侯。執瑁四寸。斜刻其下以受圭。故書曰輯五瑞。是子男之璧上亦刻爲圭首。與瑁相入。故通謂之圭也。剡殺其上。卽與瑁相入處也。

上如揖。下如授。

註疏解上下爲上堂下堂。謂上堂授玉時宜敬。故如揖。既授玉而降。雖不執玉。猶如授時。不敢忘禮也。張子正蒙云。上堂如揖。恭也。下堂如授。其容紆也。亦用註疏舊說。按下文足蹠蹠如有循。正指執玉時說。記云執龜玉舉前曳踵是也。既授玉下堂。發氣怡焉。再三舉足。又趨。見聘禮記不必蹠蹠如矣。舊說未合。集註据曲禮執天子之器。上衡。國君平衡。以揖授作平衡解。云上不過揖。卑不過授。夫既平衡。又有上下。是聖人於禮未合矣。郝京山云。上如揖。謂以左手在圭上拱護之下。如授。謂以右手。

在圭下承送之上。尙通曲禮操幣圭璧尙左手拱抱曰揖。承送曰授。聘禮授如爭。承下如送是也。此解似優勃如戰色。

邢疏云戰栗其顏色敬也。此解自當。上文兩云色勃如也。俱勃如二字成文。此句依集註戰而色懼之解。則勃字當斷如戰色當連矣。文義不協。吳可堂以臨事而懼莫甚于戰。傳會戰而色懼。則是結兩君之好。乃有三軍之懼。不倫甚矣。

享禮

近說有以享禮分作兩事者。據儀禮經文。賓裼衣束帛。加璧享。及享發氣焉。盈容皆未嘗加禮字。而享之後。私覲之前。尙有禮賓一節。儀視享覲加詳。經文若君不見。使大夫受。不禮。又禮不拜至。禮字皆專指禮賓而言。至小聘曰問。不享。主人不几筵。不禮。則直以兩事對舉。此說亦似可通。但本經執主享禮。私覲皆使臣行于主國之禮。不當插入主國禮賓一節。儀禮享下無禮字。覲上亦無私字。本經有之。特以二字爲句。無他義也。況儀禮云。若有言。則以束帛。如享禮。此又享禮二字之明明見。

于經者不必更生別解。

當暑衫絺綌必表而出之。

孔安國注暑則單服必表而出之。加上衣。按加上衣者謂加衣于絺綌之上也。喪大記袍必有表不禪。鄭注袍褻衣必有以表之。論語當暑衫絺綌必表而出之亦爲其褻也。孔疏袍是褻衣必須在上有衣以表之不使禪露。引論語者證衣上加表。觀鄭注所引。知康成解論語亦謂加衣于絺綌之上。與孔注同。朱子謂先著裏衣表絺綌而出之于外。與孔鄭之說相反。按禮有長衣中衣。

裏中著之則曰中衣。若露著之則曰長衣。以絺綌爲中衣。則外加上衣。當如孔鄭之說。以絺綌爲長衣。則先著裏衣。當如朱子之說。二說皆可通也。又玉藻振振爲衿。絺綌不入公門。表裘不入公門。鄭注二者形且裏皆當表之。乃出。疏形解衿絺綌。其形露見。裏解表裘。在衣外可鄙褻。二者皆上加表衣。乃出也。此以出爲出門。本經出之。不可作出門解。曲禮衿絺綌不入公門。鄭注衿單也。孔子曰當暑衿絺綌必表而出之。爲其形褻。疏上無表衣。則內露見爲不敬。

吉月

方望溪周官析疑云。正月之吉。康成以爲朔日。非也。考之尙書。曰月正元日。又曰正月朔旦。皆特著其爲朔。至正月上日。則變文以示其爲上旬之吉日矣。詩曰吉日惟戊。又曰吉日庚午。又曰二月初吉。是凡言吉者。乃取其辰之良。而不拘爲何日也。朱子註論語。以吉月爲月朔。亦承康成之誤。孔子致仕後。無爲每朔必朝。以自同于當官者。蓋遇君有吉事。如冠婚世子生之類。則朝服以慶賀耳。其稱吉月。謂君有吉事之月。而不定其爲何日也。愚按周官正月之吉。四時之孟月吉日。皆謂朔日。

康成之說是也。卽如懸法象魏必有定日。乃能使萬民
徧觀。若擇吉懸之。則當以所擇之日。先期曉示。而經無
文也。詩二月初吉。毛傳初吉朔日也。書正月上日。月正
元日。孔傳元日上日也。不分二解。謂變文以示其爲上
旬之吉日者。乃葉少蘊曾彥和之臆說。林少穎已辨之
矣。至以論語之吉月爲君有吉事之月。如冠婚世子生
之類。其說尤爲不根。果爾。何不直曰吉事。曲禮檀弓皆有吉事之文
而曰吉月乎。有吉事之月爲吉月。則有凶事之月爲凶
月乎。子爲國老。致仕後猶與聞朝政。哀公雖不能用。而

敬禮有加。虛懷訪問。見于魯論。戴記者不一而足。儒行
稱孔子至舍。哀公館之。鄭注孔子歸至其舍。哀公就而禮館之。是公嘗就
見孔子矣。君致敬于臣。而臣乃漠然于君可乎。吉月必
朝。禮亦宜之。若當官在位者。固不止朔日一朝也。且吉
月月朔。本孔安國註。而朱子因之。以爲承康成周官註
之誤。又失考矣。

瓜祭

孔註以瓜與疏食菜羹爲三物。瓜祭。食瓜而祭也。邢疏
引玉藻。瓜祭上環以證。朱子據陸氏釋文。瓜作必。從朱

子可也。但祭不專在豆間。禮記少儀云。凡羞有俎者。則于俎內祭。鄭註。俎于人爲橫。不得祭于間也。孔疏。羞在豆。則祭于豆間。若羞在俎。則于俎內而祭。俎在人前橫設。俎內近人之處。俎橫在人前。故不得祭于俎外。及兩俎間也。是祭有在豆間者。有在俎內者。此疏食菜羹。無俎。則祭於豆間。若統論祭禮。當兼俎內言之。其義始備。左傳齊慶封來奔。叔孫穆子食慶封。慶封汜祭。杜注。汜祭。遠散所祭。不共。孔疏。公食大夫禮。取韭菹以徧擗于醢。于上豆之間祭。又言祭鉶羹于上鉶之間。祭飲酒。

于上豆之間。是祭食之禮。各有其處。

鄉人飲酒

鄉人飲酒。方朴山引周禮族師祭酺及瓠葉詩。鄭箋爲
据。余前編已錄之。尙有一條未引及。鳧鷖詩云。既燕于
宗。鄭箋。宗。社宗也。羣臣下及民。盡有祭社之禮。而燕飲
焉。孔疏。月令仲春命民社。祭法大夫以下成羣立社。郊
特牲唯爲社事。單出里。是羣下及民庶。盡有祭社之禮。
而燕飲焉。臣民所祭。不必有尸。所云燕飲。因祭而與共
祭之人。自燕飲耳。此鄉人飲酒之又一事也。不當獨遺。

此條。月令季冬注引王居明堂禮曰。命國爲酒舍三

族。君子說。小人樂。禮器注引王居明堂禮曰。仲秋乃

命國醪。

蔡邕明堂論亦引之

居不容

古人謂坐爲居。居與寢對坐也。容卽少儀手無容毋爲口容之容。謂莊坐而不搖動其身體以爲容也。居家則所包者廣。不當與寢對矣。玉藻君子之居恒當戶。寢恒東首。亦坐與寢對言。若釋文作居不容。則當作居家解耳。

升車必正立執綏

漢書成帝本紀贊帝善爲儀容升車正立此指在車中言。本經正立執綏指升車時言。按曲禮疏綏有二一是正綏擬君之升一是副綏擬僕右之升。車既駕僕取貳綏先升。君登車則僕取正綏授君。君挽之以升。此正立執綏謂方上車時。御者授綏正立于車下而挽之以升也。顧前人舊說亦有指車中言者。一云古者立乘正立執綏所以爲固也。按車有較有式。常時憑較有所敬則憑式焉。用執綏以爲固乎。惟賈誼客經云立乘以經立

之容。右持綏而左臂詘。此或漢世有然。古不爾也。一說綏所以總轡者也。四馬兩驂凡六轡。攬之爲難。故以綏總之。然後便于執。立不正則轡有掣縱。故必正立而後六轡均調。按古之乘車。君在左。僕人居中。居中者正。以便于執轡而無掣縱之患也。今以正立執轡。指孔子則是居中自御。無僕人矣。且經傳無以執轡爲執綏者。曲禮僕執策分轡。君出就車。則僕并轡授綏。疏云分轡六轡分置兩手。各得三轡也。君初來欲上。僕并轡置一手。中所餘一空手。取正綏授君。令登車也。據此則御者以

兩手分執六轡。故詩云六轡既均。今謂六轡難執。故以綏總之。尤杜撰不根之說。